

欽定剿平粵匪方略

欽定勦平粵匪方略卷一百四 甲寅年

八月初三日 巳 邵燦奏言據河 臣楊以增函稱

琦善在營病故一時統馭乏人瓜州賊匪欲乘
間竄逸淮城偏近瓜揚爲清江門戶地當衝要
囑 臣星馳回淮以資鎮定 臣當由水路起程回
淮二十二日到署正在料理防守事宜適陳金
綬雷以誠傳

旨飭臣行抵安徽後暫留該省辦理捐輸防堵事宜惟刻下揚州迤北一帶人心浮動萬一逆匪乘間竄入勢將不支臣如在臨淮接奉

諭旨自當暫留安徽今已回至淮城未便遠離貽誤奏
八

上從之

上命軍機大臣傳諭和春福濟袁甲三曰前因瓜州軍

務緊要仍令雷以誠會同陳金綬辦理並有旨諭令邵燦於行抵安徽後暫留該省籌辦防堵事宜茲據該漕督奏稱淮城防堵亦甚喫緊勢難再行折回皖省等語本日已准邵燦仍駐淮安妥籌堵禦即可不必赴皖所有安徽現在設防督勦及一切事宜仍著和春福濟會同袁甲三實心妥辦旣不可稍存意見亦不得互相推諉總期勦賊籌餉兩有裨益各專責

成而免貽誤

初四日

庚子

陳啟邁奏言據已革總兵趙如勝等

稟報七月二十四日帶領戰船駛抵吳城該逆聞省河水軍出勦紛紛先遁僅存船百餘號停泊前河一見我軍順流而下亦卽揚帆退竄趙如勝激勵兵勇奮迅追勦連開大礮擊沈賊船二十餘隻匪船連夜竄出湖口因風浪大作沿

途傾覆多隻溺斃賊匪無數其竄擾建昌山下
渡逆船該縣景瑞正擬帶勇堵禦適九江撤回
官紳兵勇在山下渡遇賊接仗被該逆抄襲傷
亡不少帶勇從九品袁萱林外委鄧作棟手刃
數賊旋被槍傷落水殞命該縣會同縣丞趙光
裕等馳往堵剿擊斃逆匪數十人賊遂退走上
船竄逸我軍因無船隻未能窮追又據署武甯

縣事通判王宇英稟報七月中旬有土匪勾結
湖北賊匪來縣報復當經已革參將德保臨川
縣知縣馬永熾帶勇赴橫路堵禦中途猝遇賊
衆馬永熾親率弁勇向前進剿不意兩旁突出
逆衆將後路官軍截斷以致前軍腹背受敵已
革把總陳世培外委江國泰額外洪大春武舉
帥丙照俱力竭陣亡十八日大股賊匪又由東

北兩路前來攻撲遊擊富克金泰已革在籍知
縣劉馨朝已革衛千總李天鵬等出隊迎勦鏖
戰逾時斃匪三百餘名該匪稍卻復分股四面
抄襲兵勇隊伍遂亂富克金泰劉馨朝與千總
李天鵬外委金大鵬鄧步雲均同時陣亡該匪
分股潛竄義甯邊界兵勇出戰失利當卽退回
據險堵禦臣查武甯逆燄復熾城中兵勇僅千

餘名勢頗危急惟殘破之餘該匪無所覬覦義甯尚係完善之區今逆匪旣分股竄擾義甯邊境該處堵剿尤爲緊要前飭該道王訓帶兵往援武甯之舉此時暫緩啟行免致顧彼失此現在山下渡肅清卽飛飭吳錫光帶勇取道義甯徑趨武甯並派千總楊錦斌等帶勇七百名迅赴靖安以堵爲援約期會合進剿綜計武甯兵

數猶恐不敷須由省再行酌撥前往但根本重
地未便空虛惟有於外郡各營酌調弁兵來省
以資捍衛至吳城賊船雖經擊退第長江無阻
難保不復圖竄擾卽責成趙如勝於下游擇要
嚴備以固疆圉奏八

上命軍機大臣傳諭陳啟邁曰前次由九江入湖下竄
之賊經趙如勝等帶兵駛抵吳城立將逆船全數擊

退其旁竄建昌賊匪亦被官兵鄉團擊敗逃遁近省
一帶雖漸肅清惟該逆烏合之衆一聞官兵追剿遂
卽紛紛退竄並未大受懲創省垣重地尤應刻刻嚴
防勿令賊蹤闖入其武甯大股屢次撲擾現旣進攻
失利又有分股潛竄義甯邊境陳啟邁所稱派令吳
錫光帶勇前往武甯會攻並派千總楊錦斌等帶勇
赴靖安以堵爲援仍由省添撥官兵助剿籌畫尙是

但不知該員弁等是否可靠或須另派大員前往督
勦著隨時酌度妥辦道員王訓所帶之兵卽飭令仍
駐義甯實力籌勦此時塔齊布曾國藩等東下之師
已追至嘉魚蒲圻一帶恐楚境下游逆匪聞風潰竄
更向東南奔突則義甯陸路邊界與下游九江門戶
均當其衝以目下情形而論嚴防義甯要隘迅解武
甯城圍嚴扼姑塘湖口在在均關緊要該省兵力雖

單他處亦無可調撥惟當就本省兵勇船礮或勦或防妥爲布置仍責成趙如勝等督兵嚴備江防一面迅飭義甯帶兵各員妥速勦辦總期熟計統籌毋稍疏失所有武甯勦賊陣亡之遊擊富克金泰已革知縣劉馨朝已革衛千總李天鵬外委金大鵬鄧步雲已革把總陳世培外委江國泰鄧作棟額外洪大春武舉帥丙照從九品袁萱林均著各照原官交部議

卹

同日陳金綬雷以誠奏言金陵賊匪謀於浦口
紮立水營武慶令知縣曾勉禮將二道河用船
搭橋擬卽乘夜進攻溫紹原亦派撥勇丁數千
交都司富勒渾泰等於十五日赴浦接應是日
浦口水勇先已過河直入賊營殺賊數人因南
岸賊船齊來而總兵李德麟等艇船阻風未能

上駛兵勇仍行撤退該處現紮賊營一座臣等
疊催李德麟等上駛與武慶水陸轟擊並飛咨
向榮速飭吳全美葉常春率師下駛乘此賊壘
初就上下夾攻毀除淨盡以杜該逆由浦北竄
之患二十四日總兵葉常春已帶拖幫船四隻
從上游駛過下關直抵浦口與李德麟師船會
合兵力較厚風順卽當進攻其吳全美之紅單

船仍可從上游夾擊奏入

上命軍機大臣傳諭向榮陳金綬雷以誠曰逆匪圖占
浦口洲地建築水營業經疊次諭令陳金綬等設法
剿除卽陳金綬等屢次奏報亦稱督飭武慶會同李
德麟等水陸夾攻何以此次武慶與江浦六合兩縣
分帶兵勇進剿而李德麟猶以阻風爲詞以致賊營
築就如果李德麟於奉札後卽時上駛該逆斷無立

足之地何必專待吳全美葉常春師船回剿始能杜
其奸謀今賊壘已成李德麟旣藉詞推諉不能不如
所議飭令吳全美帶船駛回但此時江面攻剿正在
得手太平甫經收復蕪湖萬分喫重吳全美師船折
回後上游太覺空虛尤須嚴防皖楚賊船大幫回竄
著向榮一面飭知吳全美迅從上游順流夾擊一面
妥籌太平蕪湖一帶布置機宜不可顧此失彼徒令

得力師船往來行駛轉致兩無裨益至李德麟等所帶艇船上年株泊焦山幾及一年直至琦善嚴札催提始開赴瓜州以上協勦琦善一經出缺又復玩泄耽延屢催不進專待借力於紅單船隻試思紅單船入江原爲肅清江面節節進勦並非爲帶艇各員藏身自固地步設吳全美回勦得手竟將賊營奪毀李德麟又將以協勦居功此等狡猾之員竟至不能驅

策陳金綬何輒弱至此耶洲地突漲江心必須水師
圍剿不能專恃陸路官兵武慶旣屢次進攻甚爲奮
勇葉常春趕緊回駛亦合機宜著再嚴飭李德麟先
就現有之船剋日前進務將賊壘立時掃蕩若能迅
速毀除則吳全美一軍仍可專力上游不致掣動大
局儻再有心延宕卽著陳金綬等據實嚴參不得稍
存姑息琦善所造多槳快船現在當已竣工此項船

隻以之進攻洲地賊巢較紅單船尤爲捷便應作何
布置之處亦著迅速具奏

同日官文貴陞奏言李孟羣等督帶礮船由新
隄搜勦倒口順流直下遇賊卽擊斬獲多名將
嘉魚蒲圻等縣先後收復楊昌泗魁玉等亦由
新隄帶兵直下沿江西岸分勦將岸上竄賊捕
殺淨盡於陸溪口等處擊沈賊船數隻殺斃多

名頭隊已抵嘉魚簪洲對岸之清潭口距漢陽
一百五十里二隊已抵嘉魚對面之龍口現飭
楊昌泗魁玉等會合前侍郎臣曾國藩迅由清
潭口等處進兵毋誤機宜奏入報

初五日辛丑勝保德勒克色楞善祿崇恩奏言逆

匪死踞高唐堅匿不出臣等一面抽撥兵勇進

偏紮營一面激勵兵勇會商進攻新造一萬五
千斤大礮業已造成卽飭各員弁督率夫役挽
運礮車一面選派兵勇添募夫役於城之西北
及正北偏近賊巢之處挖濠築營以便就近攻
擊自閏月二十八至八月初一日正北西北兩
面連築三營俱已竣事其東西兩面卽當以次
添築現將大礮運至城東北面距城二百步遠

近相度地勢安設開放惟城垣堅厚一時未遽
轟破而城上賊衆甚形驚懼其東面城垣經二
千斤鐵礮晝夜轟擊已有鼓裂情形續造八千
斤鐵礮亦於日內可成若運往連環轟擊必可
摧堅破壘但該逆多係粵楚老賊窮極兇狡恐
其不待破城亟思鋌而走險臣等已熟商定議
傳令各營賊如突竄之時北路一帶臣親自帶

隊截殺各路官兵迅速繼進如向南路則臣德勒克色楞帶隊先追東路派令魁福等先追西路派令培成那敷德等先追無論賊竄何路臣聞信卽往督帶官兵跟蹤勦殺總期殲滅淨盡決不令垂斃窮寇乘隙遠颺蹇入

上命軍機大臣傳諭勝保德勒克色楞善祿崇恩曰逆匪竄踞高唐堅匿不出該大臣等前次已逼近賊巢

紮營建築礮臺現復於正北西北連築三營並用大礮轟擊覽奏各情不過專恃礮力攻擊仍未能明攻暗襲爲一鼓殲除之計逆匪雖係死黨而爲數無多我兵圍剿已及四月亦豈無隙可乘若始終遷延致敗竄餘匪牽掣全軍師老餉糜罪將誰諉况該逆見我軍逼近安營勢必亟思竄逸該大臣雖已分派各路聞信追剿而能否杜其奔突必須先事豫籌妥爲

布置斷勿令其蔓延他處致勦辦又形棘手該大臣等惟當懷遵疊次嚴旨迅圖克復務將此股賊匪就地殄除毋得日事耽延致干重罪

同日袁甲三奏言皖省軍務以現在情形而論自以克復廬州爲最要惟廬城相持日久克復尙難爲今之計惟有以偏師繞赴南路攻其不備必易得手且斷廬賊接應之路其勢旣孤萬

難久踞據臣派出剿匪文武稟報俞家灣匪巢業經擊破壽定一帶漸次肅清廬營附近可以無慮勾結臣先已密遣妥人赴南路探聽並據桐城廬江紳民方正等來營面請發兵據稱南路十餘州縣除安慶尙有六七千賊占踞往來無定其餘分踞各城多者一二千人少者三四百人民心不甘從逆官兵一到未有不薙髮景

從同心敵愾者一處得手四處響應各城必可
次第克復此安危之機斷不可失者也所難者
此行必須酌帶三四千人臣已令方正等密行
糾約多爲籌備糧米如能布置妥協卽擬親自
帶兵前進至進兵之路一由六安一由舒城現
在舒城未復繞道頗難且恐該逆先期間知早
爲豫備現擬仍以勦辦土匪爲名先到六安暫

駐或將附近各縣同時並舉或先攻一二處以壯聲威一切進止隨時酌量六安距臨淮四百餘里一水可通尙可隨時照管正陽三河尖亦可就近控制其臨淮防守事宜擬留兵勇二千名交廬鳳道張光第統率辦理奏入

命軍機大臣傳諭袁甲三曰安徽賊蹤自廬州以南十餘州縣均遭蹂躪現在俞家灣匪巢經官軍擊破

壽定一帶漸就肅清附近廬營無虞勾結此時若能
出偏師繞赴南路斷廬賊接應之道不但廬南各屬
可望廓清且翦其逆黨卽廬郡勢成孤立亦易收復
袁甲三旣令紳民方正等密行糾約多備糧米正當
趕緊發兵進駐六安糾齊義旅爲擣穴擒渠之計著
卽迅速布置督率兵勇乘勢進取或應同時並舉或
先攻一二處袁甲三到六安後隨時斟酌勿稍拘泥

惟深入重地謀事尤當慎密六安與臨淮一水可通
卽正陽三河尖等處亦可就近控制所有臨淮防守
事宜雖責成廬鳳道張光第妥辦袁甲三仍應防勦
兼籌北路防守不容稍懈毋得顧此失彼是爲至要

初六日

壬寅

上諭內閣曰前因勝保圍攻高唐未能克復降旨拔去
花翎以示薄懲原冀其感奮圖功迅殄醜類以贖前

愆乃圍剿已及四月我兵雖偏近賊壘紮營仍未能
剋期收復似此遷延觀望糜餉老師實屬大負委任
勝保著卽革職仍著督率將弁迅圖克復儻再玩延
朕必從重治罪

初七日 癸卯 僧格林沁西凌阿奏言連鎮逆匪於

八月初二日夜間分向四面撲擾放槍呐喊臣
等督率各營官兵嚴整以待該逆未敢近前各

退回巢初三日夜該逆四面來擾大股賊匪乘坐大船四隻木筏數十箇駛奔水口散秩大臣穆輅副將史榮椿督率官兵開放槍礮並拋擲噴筒火彈登時擊沈大船一隻燒燬大船一隻殄斃逆匪無數並斃僞水官總制廖姓散秩大臣穆輅此次擊賊出力前因失察兵丁沿途騷擾奉

旨摘去頂戴今既知愧奮可否

賞還頂戴之處出自

天恩奏入

上諭內閣曰逆賊困守連鎮疊被懲創窮蹙已極著僧
格林沁等督率官兵迅速進攻無任久稽顯戮穆輅
此次擊賊尙屬出力著賞還頂戴仍帶革職留任處
分

同日向榮奏言據總兵吳全美稟稱紅單船自
初四日獲勝後因在江甯鎮江面守風二十八
日始抵太平見塔下有賊船千餘泊近小河口
地方被我船連環轟擊立沈賊船三十餘隻延
燒七八十隻並搶獲賊船二十八隻餘船卽由
小河竄赴東梁山我船重大礙難深入追擊忽
西梁山夾洲內又有賊船百餘隻飛駛前來欲

襲我船之後各兵勇回帆截擊大礮排轟頃刻
沈碎數船該逆卽相率敗竄查該處有夾洲兩
道前後遮隔我船不便寄碇乃仍回泊采石磯
以扼大江江面訊問生擒各賊東梁山有賊船
千餘西梁山亦七八百隻並有多槳快船數百
與陸賊聯絡屯踞等語查金陵賊鋒屢挫而太
平係江皖衝要上由夾江小河可達兩梁山下

有陸路可通江甯鎮紅單船無陸兵策應則水師仍不能於太平駐紮而郡城仍有嘯聚之虞卽金陵賊援亦未能絕臣現飭鄧紹良俟浙兵移出黃池扼紮卽將所帶之兵由高淳就近馳往會合師船扼住太平俾得相機進取蕪湖但兩梁山賊船過多下有夾洲隔護若紅單船一經上駛賊得乘隙潛出下游竄赴金陵查紅單

船堅礮猛扼勦賊船是其所長偏攻賊壘難期
得力一自分提上駛江鎮賊援遂斷賊船阻扼
難下則麕聚上游情形至爲喫重仰蒙

聖明洞察決勝幾先上游賊船過多師船究嫌力薄必
須添調陳國泰紅單船十隻或十五隻前來助
戰更足以壯聲威而操勝算臣已遵

旨飛咨陳金綬雷以誠轉飭陳國泰迅撥師船前來與

吳全美葉常春會合連拖疊六隻共有師船四十餘隻往上攻勦以一半分泊太平梁山一帶一半駛至蕪湖池州等處則南北兩岸之賊聲氣隔絕卽可以次掃除矣其浦口九洲賊雖無多亟宜乘時攻勦以固北岸現擬調集師船與浦口六合勇練四五千會齊夾擊聲勢頗壯定可迅掃賊氛臣已節次咨商陳金綬雷以

誠翁同書並嚴飭總兵武慶李德麟等迅圖剿
洗以免金陵賊匪北竄之虞現在金陵上方橋
賊營尙在固守又該逆水路接濟艱難必於陸
路附近處劫糧江甯省城之南五十餘里爲秣
陵關人煙稠密糧食較多秣陵迤南六十里爲
溧水可由溧陽金壇竄入常郡實爲蘇省緊要
隘口臣聞該逆現勾通秣陵附近棚民七八百

人意欲進關擄掠已飭參將蔡應龍帶領兵勇一千一百名馳往迎勦並知會怡良趕緊嚴飭各該縣一律嚴防臣仍嚴飭將士乘此聲威迅掃賊壘及秣陵賊匪棚民不使或有滋擾以防內竄奏入

上命軍機大臣傳諭向榮陳金綬雷以誠曰前因金陵上游紅單船較少特允向榮所請令於陳國泰所帶

船內分撥十隻或十五隻赴上游協剿原以金陵以上江面遼闊師船二十餘隻不敷剿洗下游紅單拖罾廣艇等船共有八九十隻又有新造多槳快船是以准其酌撥嗣因逆匪於九袱洲地方占紮賊營李德麟延不進剿復諭向榮酌調矣全美帶船回駛亦爲先其所急現在洲地賊營是否業已攻毀向榮本日所奏調集師船與浦口六合練勇四五千會齊

夾擊卽著陳金綬等傳知武慶迅速進攻不可再有
延緩至此次江面師船續獲勝仗已近東西梁山緣
該處逆船甚多又有夾洲遮隔未便深入重地固因
船數較少不得不加意慎重但此項師船上駛之後
賊援已漸斷絕若竟以船少勢孤坐守采石不能派
太平而上進扼梁山則江面要截之策仍係有名無
實若因下游船隻較多添調助剿固足以壯聲威而

浦口地方現又萬分喫緊權其輕重自以各就各船
分投進剿爲要策前次既有准調陳國泰師船十隻
十五隻之旨卽著向榮與陳金綬等遵旨妥辦一俟
兵力稍厚卽可由太平上駛竟達東西兩梁山埽淨
賊船以圖次第攻剿至上方橋賊營萬不可任其久
占秣陵關通賊棚民尤應迅速剿捕該處關繫蘇常
要隘怡良是否已抵常州著向榮知會該督於溧陽

金壇一帶加意嚴防不准稍有疏失

初八日甲辰陳金綬雷以誠奏言瓜州賊匪糾合

鎮江賊衆過江相助突於七月二十八日擁出
三四千人分由東西兩岸進撲副將鞠殿華等
卽帶兵由東岸迎擊賊至八里鋪隔河地面分
爲三股抄我首尾臣金綬親自督戰三路槍礮
齊發斃賊三百餘名追至四里鋪賊忽併爲一

路我兵併力合攻追至賊壘迤北斬殺及落水者無數自辰至申殺賊約有千人此東岸接仗之情形也是日西岸賊來尤衆侍衛德興阿督帶吉林黑龍江各營馬步官兵迎勦遇賊三汊河之西南賊匪施放連環槍礮德興阿步隊蹲身而進各營官兵左右夾攻賊不能支退至八里鋪德興阿與副都統富呢雅剛阿分兩路抄

截殲賊多名追至五里莊德興阿帶佐領常陞
等由中路進擊富呢雅剛阿由右斷賊歸路復
殲賊三四百名餘賊潰竄將近賊營該逆遽撤
浮橋不能相顧盡投濠內淹斃正鏖戰時委營
總海全匹馬直衝力砍黃衣賊目僞檢點吳姓
一名賊屍徧地淹斃無算溝塹皆盈共計西岸
殺賊一千餘名割取首級五十五顆生擒五十

五名此西岸接仗之情形也其另由東岸直撲虹橋管家橋之賊計圖擄掠沿江鄉村分我兵勢復經穆克登額等由四里鋪分路勦殺斃賊數十名餘皆紛紛遁回此次殲斃及落河淹死賊匪二千有餘官兵無一陣亡尤爲全勝之仗該逆經此大挫必仍固守不出惟有乘此軍威大振之時設法環攻以期一鼓而下現在儀徵

多槳快船已將造竣連日選礮運往一俟配架
齊全即可與紅單船師船大小相輔足資得力
所有此次出力將弁可否量予鼓勵之處出自

天恩奏入

上命軍機大臣傳諭陳金綬雷以誠曰江路逆匪自艇
船上駛後援應漸斷惟鎮江瓜州兩岸逆匪聲氣相
通此次糾合死黨過江攻撲雖我兵大加殲戮特恐

該逆受創之後伏匿愈堅必須迅速設法破其巢穴
鎮江與瓜州江口對渡瞬息可達果能乘此聲威剋
日進攻並飭余萬清同時並舉該逆自必急不相顧
至江面師艇上駛者已至瓜儀以上停泊者尙在焦
山以下雖云聲勢聯絡而瓜鎮兩口仍復任賊來去
自由勦辦終難得力焦山迤上之象山北固山暨對
岸之順江洲上下均有礮隄自被賊占踞後總未議

及設法奪回金山賊築礮臺又復梗塞江路我兵戰船卽有駛至甘露寺之時往往接仗卽退不敢停泊是水軍終未占據勝勢無怪該逆日久負嵎著陳金綬等督飭將弁一面速攻瓜州一面約會余萬清各派奇兵由間道暗襲礮隄使兩岸賊勢隔絕更屬易於得手浦口洲地賊營萬不可任其久占前次疊降諭旨均係緊要機宜著陳金綬等傳知武慶嚴飭李

德麟水陸並進務期平毀淨盡不准稍有遷延奸民
接濟火藥亟應嚴行斷絕前次陳國泰所獲運米資
賊小船卽有火藥槍子等件在內恐此外尙復不少
著嚴飭水陸各營並附近地方文武明查暗訪一體
搜拏毋任稍有漏網

上諭內閣曰逆匪屯踞瓜州與鎮江逆衆勾結往來離
巢撲擾經陳金綬等督率官軍奮力攻勦共計殲斃

及落河死者二千有餘亟應乘此聲威會合水師迅
圖攻克瓜州無再延緩所有在事出力各員著陳金
綬等擇尤保奏候朕施恩

初十日 丙午和春福濟奏言廬城逆匪疊被斬擒

防備極嚴閏七月十八日各營官兵奮力進攻
接仗五時之久約斃賊匪六七百名二十二日
程智泉江忠濬等帶勇於得勝門大西門一帶

往來誘敵該逆由南門突出千餘人嵩瑞等聞
信馳至合力攻剿斃賊二三百名二十五日探
聞由巢湖駛入之賊因秋稼登場意在搶糧城
內賊匪亦思撲出接應於二十六日各營兵練
馳至南鄉七里站奮力圍攻賊營斃賊二百餘
名生擒僞軍師周鳴江並著名賊目十二名砍
獲首級二十七顆奪獲器械八十餘件八月初

一日常清等帶領兵勇攻擊西門得勝門賊匪
千餘人突由得勝門擁出常清等三面夾攻斃
賊二百餘名敗竄入城伏匿伏思逆匪屢被痛
勦其計已窮現在一味堅守官兵攻倡殆無虛
日據節次生擒賊匪及逃出難民供稱城內米
糧尙足菜蔬油鹽甚少等語臣現在設法招集
南鄉團練斷其接濟俾得迅圖克復

和春福濟又奏言該逆自上年冬竄入英山盤踞蹂躪經臣等調六安州候選知州李元華候補知州博勒霍布六安州知州茅念劬招集團練一由金家寨一由霍山分起前進行抵英山境內二十一日直抵北城之竹絲嶺該逆正在築壘經前隊祝澂鑑等奮勇進剿賊見我兵突至紛紛驚潰有長髮數十名上前迎拒生擒九

人立即梟示其餘敗退入城二十二日北路徐振卿樊文鐸等越山直撲城根將附郭民房燒燬火光燭天西南守城賊匪見北路火起越城逃走江繼陶等即由西南城垣蟻附而上殺死守垛逆匪賊皆驚潰開南門逃逸復經北門樊文鐸徐振卿等砍伐樹木梯城而入殺斃指揮賊目四名各門大開我軍一齊擁入城內賊匪

搜殺淨盡並殺逆首張和尚一名此外逃出賊
匪復經祝昌奎等督勇尾追殺斃逆賊無數直
追至城南瓦寺前交湖北蘄水縣界方始收隊
奏入

上命軍機大臣傳諭和春福濟曰逆匪占踞廬州恃爲
巢穴我兵攻勦雖屢獲勝仗擒斬甚多究未能掃穴
擒渠剋期收復據稱城內米糧尙足該逆勢必負隅

死守此時總當出奇制勝力破堅城斷不可再延時
日英山旣已克復其舒城逆匪仍著嚴飭秦定三迅
速進剿儻能將該逆分踞之處次第收復則賊勢日
孤勦辦自易爲力

上諭內閣曰逆匪竄踞廬州屢被痛剿勢甚窮蹙著和
春等督飭兵勇奮力進攻迅圖克復郡城無稍鬆懈
其竄踞英山之賊經和春等派委六安州候選知州

李元華等相機籌辦將餘匪搜殺淨盡並將逆首張和尙殺斃立將縣城克復該逆自上年冬間竄入英山盤踞蹂躪經官紳團勇等奮力攻勦殲斃逆首克復縣城辦理尙合機宜所有在事出力官紳並陣亡義勇著一併查明分別奏請恩施以昭激勸

和春福濟又奏言據江浦縣曾勉禮稟報上月初旬賊於草輮峽放船百餘隻又在浦口北岸

中路與八字溝各紮營盤又於夾新灘地方添設礮位等語據全椒縣陳其昌稟報有賊船三百餘隻在和州鍼魚嘴地方游弋等語查目前賊勢已經江面師船疊次截擊南岸陸路又經向榮分兵駐紮益難竄越其江北各處六合官紳防守極嚴江浦情形已覺喫重和州含山被賊擾後民無固心官成虛設且夾江離浦口十

里上溯三十餘里卽抵烏江又四十里直抵和
城夾江已有賊營勢必乘虛竄擾若使復踞和
含接應廬巢賊勢蔓延辦理愈形棘手大營相
距旣遠兼顧爲難臨淮又無兵可分勢難坐視
應請

旨飭令雷以誠於揚州軍營抽撥兵勇一千名由儀六
馳赴和州督率嚴防勿任竄入雷以誠一時不

能起程卽令遴派得力員弁帶領一千兵勇先
赴該處防禦奏入

上命軍機大臣傳諭托明阿陳金綬雷以誠曰現在金
陵上游水軍屢獲勝仗南岸陸路經向榮分兵駐紮
江浦情形較前喫重和春等所奏和州含山亟須堵
禦原係實情惟昨據陳金綬等奏攻勦瓜州賊匪東
西兩岸甫經得手正當迅速督率水陸各軍破其巢

穴托明阿起程已久計當抵揚著通盤籌畫雷以誠
是否能親赴和州瓜州攻勦當喫緊之際或於儀徵
六合等處防兵內酌撥兵勇前往堵防之處務須妥
籌辦理並將能否分兵之處飛咨和春等以免貽誤
不得顧此失彼

十四日
戊辰陳金綬雷以誠奏言臣等查瓜州賊

匪環城列壘引水注濠圖疲我師不如乘勝環

攻漸圖深入因卽先期布置傳令東西岸官兵
於初五日寅刻會齊四里鋪等處各帶木板搭
橋蒲包裝土以爲填濠進攻之用是日東岸副
將鞠殿華等督隊前行用土填平運河水口官
兵搶過外濠又用土填平水路三條以通攻勦
之路賊壘槍礮如雨當開銅礮擊斃望樓上賊
三四名西岸副都統德興阿等於四更卽至五

里莊帶領各營馬步隊直撲瓜州用銅礮擡槍
擡礮向賊隊連環轟擊該匪紛紛倒地當拆毀
賊卡礮臺三處轟斃約數十名參將安勇砍斷
攔河鐵練三條陳國泰亦分駕礮船駛下偏近
瓜州施放大礮將南面沿江土城擊缺一處至
未刻風色不利始行退出臣等查是日四面環
攻原期漸逼賊巢即可前進今填河搭橋毀其

集賢堂 卷之四 三三
近卡礮臺斷其橫河鐵練當無阻隔祇以風力
漸微我師一時未能得手擬仍會商夾攻水陸
大舉冀得仰賴

天威一鼓而下奏八

上命軍機大臣傳諭托明阿陳金綬雷以誠曰瓜州濱
臨江岸必須水陸同時進攻使該逆四面受敵始可
乘勢力破賊巢此次陸路官兵已獲勝仗而陳國泰

所駕礮船僅擊缺沿江土城一處旋即退出所稱風色不利殊難憑信水師疲玩積習最堪痛恨著托明阿等嚴飭水陸各將弁務當乘此聲威同時並進剋期收復瓜州儘此進彼退不能互相接應查明何路延緩即將何路貽誤之員嚴叅懲辦逆匪屢被攻剿難保不計窮思竄著該大臣等一面迅速進攻一面嚴防該逆分竄之路總期一鼓殲除毋令再滋延蔓

十五日辛亥勝保德勒克色楞善祿崇恩奏言查

高唐城高本有二丈三四尺臣前將大礮向東北面城垣日夜轟擊現已轟塌數尺寬至二三丈賊見城被擊壞急用木板遮護囊土修補我兵用槍礮齊擊傷賊甚多現已挑選兵勇一有罅隙卽當督兵破入初九初十等日於東南偏近處所築就三營派撥兵勇防守十一日臣復

令於城南正對南關處紮營絕其竄路南經空濠城上密放槍礮不能興作臣令將隊伍復至關廂誘令出巢賊果突出二百餘人李開芳親自率領撲出南關山東官兵開槍迎擊死拒不退臣親督天津正定官兵馳往督戰賊見我兵勢猛卽退伏於敗屋牆內於牆孔內密放擡槍臣揮兵勇冒死撲至屋垣之下拋入火彈將賊

火藥焚燒斃賊多名該逆皆楚粵老賊拌命死
拒臣復令將銅礮洋礮調至切近處所向賊衆
連環轟擊放火焚燒敗屋賊卽退入城內臣嚴
督兵勇追殺直抵城下城上槍礮如雨以致兵
勇傷亡二十餘名現在東南營壘業已築成西
南亦卽趕緊興築以資控扼但現有兵勇實屬
不敷分撥連鎮所留步隊攻勦喫緊又未便續

調前來不得已與臣崇恩熟商就近抽調臨清
德州防兵四百名迅速來營以資分撥圍剿奏
入

上命軍機大臣傳諭勝保德勒克色楞善祿崇恩曰覽
奏雖小有接仗斃賊無多我兵復有傷亡未能得手
該大臣布置數月之久乃自今日始知賊情必思南
竄甫爲空濠之計而於南關外居民牆垣竟未能及

早拆毀所築營壘又未能一律趕緊辦齊復曉曉以步隊不足爲詞殊不可解用兵貴兼謀勇豈能專借兵力古人以少擊衆在乎審機神速切忌遲疑該大臣前次造雲梯呂公車築臺鑄礮輾轉因循徒延時日卽以兵力而論豈有鉅萬兵勇不能舉此孤城而令千餘逆匪得以負隅堅拒之理明知連鎮官兵不能再分便不必宛轉解說妄冀添調豈將以遲延之

咎欲令連鎮大營分謗耶著勝保與德勒克色楞善
祿崇恩勦力同心剋期收復州城盡殲醜類毋得再
令竄逸若再耽延貽誤國法具在不能以該大臣曾
有微勞曲爲寬宥也

同日塔齊布曾國藩奏言逆匪竄回武昌後臣
等本欲乘勝東下直擣武漢旣而再四熟商陸
路之賊尙有崇陽大股數逾二萬卽自岳竄出

者分匿於臨蒲咸嘉等縣山僻之處亦恃崇陽
爲巢穴若不先勦崇邑大股而遽下武昌恐後
路牽掣餉道中梗終非萬全之策水路則東有
倒口陸溪口黃蓋大冶密泉等湖西有襄河上
通洪湖朱耳湖下通沌口漢口若非節節搜勦
則恐藏匿小舟抄襲後路亦非慎重之道是以
審度定計陸路則臣塔齊布親往崇陽進勦水

路則臣國藩步步移營徧搜支湖小河然後扼險要以蹙之閏七月初十日探明黃蓋湖內之新店尙存賊船數十號有賊千餘人遊擊楊載福等親駕長龍三板由倒口入湖初更時行至芭茅湖距新店三里許楊載福等將長龍船盡紮湖濱各坐三板駛進突放槍礮該逆猝出不意轟斃溺斃者無數餘皆上岸狂奔楊載福首

衝賊隊被賊回擲火包舟覆落水旋即躍上守
備蕭捷三坐船大呼突陣將賊船四十餘隻登
時燒盡並將芭茅湖山後賊船及沅潭市聶家
市各船燒燬一空黃蓋湖等路亦搜捕無遺直
抵嘉魚縣城副哨官馮登等會同官文派到兵
勇合剿附城大股該逆竄入崇陽知縣孫守信
等入城安撫居民各營水師始行收隊回紮新

隄老營東岸搜勦已徧乃遣嚮導官何南青搜
查西岸裏河一律肅清於是水師乘勝直下金
口扼據要隘距武昌僅六十里矣金口之東有
淮山西有大軍山小軍山兩岸對峙關鎖謹嚴
爲水路必爭之地該逆不虞我軍猝至乃乘我
大隊未齊水陸兩路來犯蕭捷三等嚴陣以待
各哨官分駕三板往西岸大軍山下遏賊上竄

陸賊千餘人先由淮山越嶺而來直入金口市
翼誘我軍登岸而以小艇突入奪我戰船隨有
賊舟百餘號分兩翼來抄我軍亦分兩路迎擊
將該逆快船轟壞並擊沈小船二十餘隻水賊
始行敗走陸賊亦敗北回竄此搜剿湖匪及金
口水師大勝之實在情形也臣塔齊布既定親
剿崇陽之策知崇陽臨蒲三縣以羊樓洞爲總

隘必紮老營於此然後可以四面策應遂督率
各營馳赴羊樓知府羅澤南率湘勇千人先行
十七日宿長安驛十八日賊千餘人乘我不備
分四路撲營羅澤南令湘勇誘賊近營突出抄
尾賊衆大潰次日進紮羊樓洞各營次第皆到
四川臬司胡林翼亦自常澧帶勇來會臣塔齊
布探明附近羊樓洞山崖險峻爲赴崇第一關

隘遂派羅澤南於二十三日出隊進剿該匪於
洞尾盧家橋紮立大營中跨溪水攔截隘口我
師直抵賊穴踰溝冒刃踏破賊營墮岸死者甚
多盧家橋之卡旣破賊衆悉銳踞守佛嶺佛嶺
兩山高峻羊腸一縷尤爲險絕二十四日羅澤
南等督勇由佛嶺之東西北三面分路直攻賊
巢攀巖踰嶺冒險而進賊衆大潰我兵追奔十

五里至雙港口止二日之內東西兩卡皆破崇陽首逆僞總制廖敬瞬探知我兵大隊未進在羊樓洞者不及千人乃自崇城調賊三千餘名前來二十六日猝至羊樓洞尾四面環攻羅澤南率勇迎勦振鼓馳突賊勢瓦解我軍中路之兵乘勝擁上山岡追至盧家橋約七里許殺賊二百餘名蕭啟江追右路之賊圍入石山內殺

賊百餘名餘賊竄匿墮崖死者無算此陸兵連
破賊卡及羊樓大獲勝仗之實在情形也有此
數戰崇陽股匪業已膽寒臣塔齊布現統大隊
進攻臣國藩現駐嘉魚卽日馳赴金口一俟崇
陽股匪勦畢卽當水陸並進直擣武昌探明武
漢賊黨不過二萬餘人自岳州大敗人有離心
臣等宣布告示解散脅從自賊營薙髮逃出者

幾四千人又北路有署督臣楊需之兵西岸有
魁玉楊昌泗之師聲威大有可恃然臣等仍當
慎之又慎不敢萌驕矜之志不敢貪急遽之功
以期仰慰

聖懷於萬一奏入

上諭曰此時非徒知謹慎所能了事汝等自湘潭大捷
後屢次得手有此聲威豈可自餒惟利在速戰莫待

兩下相持師勞餉乏塔齊布不致爲崇陽一股牽掣
方好

十七日癸丑向榮奏言江甯將軍蘇布通阿昨因

七橋礮營盤督戰突被火藥燒傷兩旬以來設
法救治無如火傷甚重熱毒內攻竟於八月初
八日出缺該將軍秉性忠誠才識歷練自到營
後每戰必奮勇當先大小接仗一百數十次斬

檢無算茲以傷重捐軀實堪憫惻合無仰懇

天恩俯准照陣亡例從優賜卹以慰忠魂奏入

上諭內閣曰江甯將軍蘇布通阿統帶四川官兵協同
向榮剿賊自抵軍營以來每遇接仗奮勇當先朕心
正深嘉獎前因七橋壩督戰禦賊身受重傷諭令安
心調理方冀速痊藉資倚畀茲聞因傷溘逝悼惜殊
深蘇布通阿著照將軍陣亡例從優賜卹任內一切

處分悉予開復應得卹典該衙門察例具奏伊子榮
昌榮恩榮麟均著俟百日孝滿後由該旗帶領引見
用示朕篤念蠶臣至意